




Darasa la 2

Kitabu cha hadithi 4

Kiswahili

- ★ **Sababu ya Paka
Kupenda Kukaa Jikoni**
- ★ **Kwa nini Twiga ana
Shingo Ndefu**




Sababu ya Paka Kupenda Kukaa Jikoni

Mwandishi: Nashera Ara Kodawa

Mchoraji: Bonface Andala

Hapo zamani, paka alikuwa rafiki ya Mzee Mkulima. Paka aliishi na Mzee Mkulima na mkewe Malkia. Kila siku baada ya chakula cha asubuhi, paka na Mzee Mkulima waliondoka kwenda shambani kulima na kutafuta chakula.



Paka alishangazwa na mambo mawili. Kwanza, Malkia alimpokea Mzee Mkulima kila waliporudi. Malkia alichukua chakula chote na kukipeleka jikoni. Paka aliona kuwa, Malkia humpokonya Mzee Mkulima chakula chote bila mzee kusema chochote.

Pili, Mzee Mkulima hakuwahi kumpa paka chakula wakiwa shambani. Hata hivyo, kila mara Malkia alipopika chakula, alikuwa akimpa paka chakula kingi. Mambo haya mawili yalimfanya paka ampende Malkia zaidi ya Mzee Mkulima.



Baada ya siku kadhaa, paka
alichoka kwenda shambani na
Mzee Mkulima.

Aliona ni bora kukaa jikoni na
Malkia. Akawa rafiki ya Malkia.

Paka akawa hatoki jikoni tena.

Mzee Mkulima alisikitika sana kwa kukosa rafiki wa kwenda naye shambani.

Siku moja akamwita paka na kumuuliza, “Rafiki yangu, kwa nini siku hizi hutaki kwenda shambani na mimi?” Paka alimjibu, “Mzee, mimi sikujua una uchoyo na woga hivyo. Tukienda shambani sote, hunipi chakula chochote. Tunapofika nyumbani, mama hukupokonya chakula chote na hata husemi kitu. Mama akitayarisha chakula, hunipa, nala hadi nashiba.”



Paka aliendelea, "Kwa hivyo mzee, mimi siendi na wewe shambani tena. Mimi nitakaa na mama jikoni. Siwezi kwenda shambani na mtu mchoyo na mwoga kama wewe."

Kuanzia siku hiyo, urafiki wa paka na Mzee Mkulima uliisha.



Paka akahamia jikoni mpaka leo.

Maswali


1. Mke wa Mzee Mkulima aliitwa nani?
2. Taja mambo mawili ambayo yalimshangaza paka.
3. Kwa nini paka alimpenda Malkia zaidi ya Mzee Mkulima?

Kwa nini Twiga ana Shingo Ndefu

Mwandishi: **Stephen Kwoma**

Mchoraji: **Bonface Andala**

Hapo kale wanyama waliishi pamoja. Kila mnyama alimpenda mwenzake. Sherehe zote walifanya pamoja.




Siku moja, Sungura aliwaalika wanyama kwa harusi ya binti yake. Wanyama hawa walifurahia sana mwaliko huo. Hivyo basi, wanyama walijiandaa kwa kila namna ili kuhudhuria harusi hiyo.

Wanyama walinunua nguo nzuri nzuri. Wengine waliomba mavazi kutoka kwa marafiki zao. Twiga alienda kuomba mkufu kutoka kwa Swara. Swara alisita kumpa Twiga mkufu. Mwishowe Swara akakubali kumpa mkufu.

Siku ya harusi ilipofika, wanyama walivalia mavazi yao ya kupendeza. Twiga naye aliuvaa mkufu aliouomba kutoka kwa Swara.


Twiga alipendeza mno mpaka kila
mnyama akautamani ule mkufu
wake.



Harusi yenewe ilikuwa ya kufana sana. Wanyama walikula vyakula vitamu na kucheza densi. Sungura alifurahia kufika kwa wanyama wenzake. Aliwashukuru kwa kufika katika harusi ya bintiye.


Sherehe zilipoisha, kila mnyama alienda zake kupumzika. Twiga naye alitorokea msituni na ule mkufu wa Swara.

Swara alimsubiri Twiga arudishe
mkufu wake lakini wapi! Siku
iliyofuata, Swara alimwendea
Mfalme Ndovu na kumshtaki Twiga.
Ndovu aliwaita wanyama wote na
kuwaamuru wamtafute Twiga.



Twiga alipopatikana, alifikishwa
mbele ya Mfalme Ndovu. Wanyama
walijaribu kumvua ule mkufu lakini
hawakuweza.

Waliposhindwa wakapendekeza
mbinu tofauti za kuuvua ule mkufu.
Sungura alisema, "Tumfunge
kisha tumchape." Mfalme Ndovu
alikataa wamchape Twiga. Chui
naye akasema, "Tumfunge kamba
kisha tuuvute mkufu kwa nguvu."
Wanyama wengi walionekana
kufurahia pendekezo hilo.



Twiga alifungwa kamba kisha
Ndovu akauvuta mkufu kwa
kuutumia mkonga wake.

Vile Ndovu alivyouvuta
mkufu ndivyo shingo ya Twiga
ilivyoendelea kuwa ndefu.

Hatimaye, mkufu ulitoka lakini
shingo ya Twiga ikawa ndefu.
Kwa hivyo Twiga aliona aibu
akatorokea msituni.

Maswali

1. Wanyama walialikwa kwa sherehe ya harusi ya nani?
2. Twiga alimuomba Swara nini?
3. Kwa nini Swara alimshtaki Twiga kwa Mfalme Ndovu?
4. Ni nani aliyewaambia wanyama wauvute mkufu?
5. Ni nani aliyevuta mkufu kutoka shingoni mwa Twiga?

★ Sababu ya Paka Kupenda Kukaa Jikoni

★ Kwa nini Twiga ana Shingo Ndefu

Vitabu vya hadithi vya **Tusome** vimeandikwa kwa ustadi wa hali ya juu ili kusaidia kuinua kiwango cha kusoma kwa wanafunzi wa darasa la 1 na la 2. Hadithi hizi zinawapa wanafunzi nafasi ya kufurahia hadithi na kuinua uelewa wa hadithi nje ya masomo ya kawaida darasani. Vitabu hivi vinaweza kutumiwa na geyote anayejifunza Kiswahili. Tunashukuru kwa usaidizi wa SIL LEAD kwa mchango wao katika kuandika hadithi hizi. Ili kusaidia katika juhudii hii, hadithi hizi zimeandikwa kwa kuzingatia yafuatayo:-

- Luga rahisi kwa wanafunzi na sentensi zenyenye urefu unaofaa,
- Picha za kuvutia ambazo hazielezi hadithi kikamilifu lakini zinamwezesha msomaji kusoma zaidi ili aelewewe hadithi,
- Hadithi za kufurahisha zenyenye maudhui na dhamira ambazo msomaji anayeanza kusoma atawezeku kulinganisha na maisha yake ya kila siku,
- Vichwa vya hadithi ambavyo vinamwezesha msomaji kutabiri.

Hadithi katika msururu huu ni:

Darasa la 1: ▶ Fisi Mjinga **na** Chura na Kiboko

▶ Mchezaji Banda **na** Kisa cha Simba na Mbuni

▶ Faida za Ng'ombe **na** Siku za Wilki

▶ Kwa nini Mzee Kobe ana magamba **na** Jitu la Mtoni

Darasa la 2: ▶ Shujaa Musa **na** Mnyama Nimpendaye

▶ Mama Mzee na Nguruwe **na** Juma na Sungura

▶ Fisi na Mbuzi **na** Kuku na Mwewe Wakosana

▶ Sababu ya Paka Kupenda Kukaa Jikoni **na** Kwa nini Twiga ana Shingo Ndefu

▶ Safari ya Mombasa **na** Masaibu ya Musa



USAID
FROM THE AMERICAN PEOPLE



Kitabu hiki kimechapishwa kwa ufadhili kutoka kwa Shirika la maendeleo ya kimataifa la Marekani (USAID/Kenya) na Idara ya maendeleo ya kimataifa ya Uingereza (DFID/Kenya) kuitia mradi wa Tusome Early Grade Reading Activity.